



SUASANA berbuka puasa di Masjid Ar-Rahman, Bangsar.

JEMAAN menikmati juadah berbuka di Masjid UKM.

KEMBARA IFTAR BERJEMAAH

■ Pelajar tukar masjid setiap hari untuk berbuka puasa, tunai solat Tarawih



Asrizal Aris
asrizal.aris@metro.com.my

Kuala Lumpur

Rata-rata mereka yang memilih berbuka puasa di masjid menganggap cara ini boleh merapatkan silaturahim dalam kalangan umat Islam, selain menjimatkan perbelanjaan dan mengelakkan penat. Pelajar Universiti MAHSA Abdul Hakim Shahbudin, 24, berkata, dia akan bertukar masjid setiap hari untuk menyertai majlis berbuka puasa dan menjalani ibadah solat tarawih.

"Saya bersama beberapa rakan akan berganti mengunjungi masjid setiap hari untuk menikmati juadah berbuka dan menjalani ibadah solat sunat Tarawih bersama imam yang berbeza.

"Bukan memilih, tetapi ia menjadi pengalaman yang bermakna bagi pelajar di ibu kota pada bulan Ramadan bagi tahun ini," katanya ketika ditemui di Masjid Ar-Rahman di sini.

Pelajar Universiti Kebangsaan Malaysia (UKM), Nur Mubal Wad Saif, 22, berkata, masjid UKM bukan saja dipenuhi pelajar, malah turut menerima kunjungan daripada penduduk sekitar dan pelajar dari universiti lain.

"Setiap masjid masing-masing ada kelebihan, namun apa pun juadah yang disediakan, pendekatan ini mendidik orang ramai untuk mengimarahkan masjid," katanya ketika ditemui di Masjid UKM, Bangsar.

Sementara itu, Pengarah Pusat Islam Universiti Putra Malaysia (UPM), Mat Razi Abdullah berkata, selain membantu pelajar dan penduduk yang tidak berkemampuan, majlis iftar juga mengeratkan hubungan serantau apabila Masjid UPM turut menerima kunjungan umat Islam dari luar negara.

"Seramai 600 hingga 700 jemaah akan memenuhi ruang masjid dan mereka akan menikmati juadah berbuka dalam talam yang dikongsi seramai empat hingga lima orang.

"Selain itu, setiap Isnin hingga Isnin, Labu bungkus bubur lambuk akan disediakan kepada jemaah sebagai bekalan tenaga malam atau bersahur untuk mereka yang tidak mampu," katanya ketika ditemui di Masjid UPM, Serdang.